



Republika e Kosovës
Republika Kosova – Republic of Kosovo

KËSHILLI I PAVARUR MBIKËQYRËS PËR SHËRBIMIN CIVIL TË KOSOVËS
NEZAVISNI NADZORNI ODBOR CIVILNE SLUŽBE KOSOVA
INDEPENDENT OVERSIGHT BOARD FOR THE CIVIL SERVICE OF KOSOVO



Datë: 15.01.2026

Numër Protokolli: 162/2026

A.nr.1953/2025

Këshilli i Pavarur Mbikëqyrës për Shërbimin Civil të Kosovës–Kolegji për Shqyrtimin dhe Vendosjen e Ankesave, në përbërje nga: Eshref Shabani- kryetar, Haxhnikaj Demi dhe Malsore Gashi Bajraktari, anëtar, me Rushit Kajtazi, në cilësinë e procesmbajtësit, në procedurë sipas ankesës me numër A.nr.1953/2025, të datës 27.11.2025, të parashtruar nga ankuesja N.R, të cilën e përfaqëson me Autorizim avokatja Myrvete Hashani-Jashari kundër organit të punësimit/Komunës së Prishtinës, në çështjen juridike “*shkelje e të drejtës në pagë*”, duke vepruar në pajtim me nenin 6, paragrafin 1, nën paragrafin 1.1 dhe nenin 18, paragrafin 1, nën paragrafin 1.2 dhe 1.4 të Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës i ndryshuar dhe plotësuar me Ligjin Nr.08/L-180, si dhe në mbështetje të Rregullores Nr.02/2018 për Procedurën e Shqyrtimit dhe Vendosjes së Ankesave në Këshillin e Pavarur Mbikëqyrës për Shërbimin Civil të Kosovës, me datë 15.01.2026, mori këtë:

V E N D I M

I. Aprovohet si e bazuar ankesa me numër A.nr.1953/2025, të datës 27.11.2025, të parashtruar nga ankuesja N.R ashtu që **detyrohet** Sektori i Burimeve Njerëzore i Komunës së Prishtinës, që të bëjë shqyrtimin e kërkesave të datës 01.10.2025, të parashtruar nga ankuesja e lartshënuar, dhe të nxjerr aktin administrativ në pajtim me legjislacionin në fuqi, brenda afatit prej pesëmbëdhjetë (15) ditësh nga dita e pranimi të këtij vendimi.

II. Këshilli i Pavarur Mbikëqyrës për Shërbimin Civil të Kosovës, duhet të njoftohet me shkrim pas ndërmarrjes së veprimeve në pajtim me këtë vendim.

Arsyetim

Ankuesja, N.R (me tej referuar vetëm ankuesja) me datë 27.11.2025, përmes të autorizuarës avokates Myrvete Hashani-Jashari, ka parashtruar ankesë në Këshillin e Pavarur Mbikëqyrës për Shërbimin Civil të Kosovës, e regjistruar nën shenjën A.nr. 1953/2025, kundër mos marrjes së përgjegjësisë lidhur me kërkesën e datës 01.10.2025, të parashtruar tek Njësia e Burimeve Njerëzore e Komunës së Prishtinës.

Këshilli i Pavarur Mbikëqyrës për Shërbimin Civil të Kosovës (*tutje referuar Kolegji i Këshillit*) bazuar në dispozitat e Rregullores Nr.02/2018 për Procedurën e Shqyrtimit dhe Vendosjes së Ankesave, me datë 05.12.2025, e ka proceduar kërkesën për përgjigje në ankesë tek Komuna e Prishtinës, ndërsa kjo e fundit më datë 06.01.2026 ka dërguar përgjigjen në ankesa së bashku me shkresat e bashkangjitura të lëndës.

Kolegji për Shqyrtimin dhe Vendosjen e Ankesave (në tekstin e mëtejshëm referuar: Kolegji i Këshillit) për vendosje meritore administroi këto prova: Ankesa me numër protokolli An. =. 1953/2025 të datës 27.11. 2025, e parashtruar nga ankuesit në Këshillin e Pavarur Mbikëqyrës për Shërbimin Civil të Kosovës; Autorizimi i datës 25.11.2025; Kopje e letërnjoftimit për ankuesen; Akt Emërimi i datës 19.11.2024, për ankuesen; Pagesa për periudhën nga data 01.12.2024, deri me datën 31.12.2024; Pagesa për periudhën nga data 01.02.2025, deri me datën 28.02.2025; Kërkesën, e datës 01.10.2025, drejtuar Sektorit të Burimeve Njerëzore të Komunës së Prishtinës; Kërkesën për përgjigje në ankesë e datës 05.12.2025, dërguar nga R.K, për E.P; Përgjigjen në ankesë me numër protokolli 1953/2025, e datës 06.01.2026; Përshkrimi i detyrave të Punës “Zyrtar për Arkiv 4”; Diplomë e datës 13.05.1984, për N.R; Kërkesën e datës 24.03.2025, drejtuar Sektorit të Burimeve Njerëzore të Komunës së Prishtinës; Kërkesën me numër protokolli 14-117/01, e datës 01.10.2025, drejtuar Sektorit të Burimeve Njerëzore të Komunës së Prishtinës.

Kolegji i Këshillit, pasi që ka shqyrtuar të gjitha shkresat e lëndës, ka konstatuar se meqenëse nuk është nxjerr akt administrativ lidhur me kërkesën e ankueses, atëherë ekziston baza ligjore që të detyrohet Njësia e Burimeve Njerëzore e Komunës së Prishtinës, të nxjerr aktin administrativ në pajtim me legjislacionin në fuqi lidhur me shqyrtimin e kërkesës të dates të lartshënuara parashtruar nga ankuesja, *sepse:*

Nga administrimi i shkresave të lëndës të ofruara nga palët në procedurë, Kolegji i Këshillit konstatoi se ankuesja N.R, sipas Akt Emërimit me numër protokolli Nr. 01-112-245, të datës 19.11.2024, mbanë pozitën “ Zyrtare për Arkiv”, ndërsa me datën 01.10.2025 ankuesja i është drejtuar Sektori i Burimeve Njerëzore të Komunës së Prishtinës, me kërkesë me arsyetim se sipas Akt Emërimit me numër protokolli Nr. 01-112-245, të datës 19.11.2024, është dashur që të paguhem që nga muaj dhjetor me koeficient GJ33, 5.1, ndërsa deri me tani nuk jam paguar me këtë koeficient.

Kundër heshtjes administrative të Njesisë së Burimeve Njerëzore të Komunës së Prishtinës, ankuesja kanë parashtruar ankesë në Këshillin e Pavarur Mbikëqyrës për Shërbimin Civil të Kosovës, me pretendimin ankimor kundër heshtjes administrative që të ndërmarrën të gjitha veprimet administrative dhe procedurale për të zbatuar dhe ekzekutuar Akt Emërimi me numër protokolli Nr.01-112-245, i datës 19.11.2024, për ta bërë pagesën e pagës sipas koeficientit GJ.33.5 5.6, në Profesional 2, me tej ankuesja pretendon që të aprovohet ankesa e ankueses i e bazuar dhe të detyrohet Komuna e Prishtinës Kryetari i Komunës së Prishtinës të ekzekutohet Akt Emërimi me numër protokolli Nr.01-112-245, i datës 19.11.2024, për të bërë kompensimin e pagesën së pagës nga koeficienti 4.5, në koeficient 5.6, nga data e nënshkrimit të akt Emërimit.

Lidhur me vendosjen e kësaj çështje juridike-administrative, meqenëse palët ankuese, kanë parashtruar kërkesë sipas datës të shënuar në dispozitiv të këtij vendimi, tek Njësia e Burimeve Njerëzore të Komunës së Prishtinës, atëherë Kolegji i Këshillit, lidhur me obligimin e organit publik që të shqyrtoj kërkesën e palës dhe të nxjerr aktin administrativ, iu referua Ligjit Nr.05/L-031 për Procedurën e Përgjithshme Administrative respektivisht nenit 11 paragrafi 3 nën paragrafi 3.2, i cili përcakton se: *“3. Organi u siguron personave të interesuar dhe palëve informacion të saktë, të qartë dhe të kuptueshëm rreth: 3.2. kërkesave thelbësore ligjore si dhe procedurave e formaliteteve të parashikuara për nxjerrjen e një akti administrativ apo realizimin e një akti real të kërkuar, përfshirë këtu edhe dokumentet dhe deklaratat që duhen parashtruar”*, nenit 27 paragrafi 1, i cili përcakton se: *“1. Përveçse kur parashikohet ndryshe me ligj, zyrtari përgjegjës zhvillon procedurën administrative, vendos për çështjen, e nënshkruan vendimin si dhe siguron njoftimin e palës”*, nenit 97 paragrafi 1, i cili përcakton se: *“1. Një procedurë administrative e nisur sipas kërkesës, përfundon me njoftimin e një akti administrativ apo lidhjen e një kontrate administrative”*, në këtë rast, në kuptim të nenit 98 paragrafi 1 dhe 2 të Ligjit Nr. 05/L-031 për Procedurën e Përgjithshme Administrative, ku përcaktohet se: *“1. Procedura administrative nisur sipas kërkesës, do të përfundojë sa më shpejt që të jetë e mundur, por jo më vonë se sa afati i përcaktuar me ligj të veçantë për atë lloj procedure. 2. Në rast se ligji i veçantë nuk ka paraparë një afat, siç është paraparë në paragrafin 1 të këtij neni, afati i përgjithshëm i zbatueshëm për përfundimin e procedurës administrative është dyzetepesë (45) ditë nga fillimi i saj”*, dhe për rrjedhojë konstatoi, se organi të cilit i është drejtuar kërkesa, në rrethanat e rastit konkret Njësia e Burimeve Njerëzore e Komunës së Prishtinës, është dashur të vendos brenda afatit prej 45 ditësh, apo të aplikohet neni 99 i Ligjit Nr.05/L-031 për Procedurën e Përgjithshme Administrative, mirëpo meqë kërkesat e palëve ankuese nuk janë shqyrtuar, atëherë është aplikuar heshtja administrative.

Sipas dispozitave ligjore në fuqi në rast se organi publik hesht ndaj kërkesës së palës, atëherë palës i lind e drejta që të parashtror ankesë tek organi i shkallës më të lartë kundër heshtjes administrative duke u bazuar në dispozitat e nenit 127 paragrafi 4 të Ligjit Nr. 05/L-031 për Procedurën e Përgjithshme Administrative, ku përcaktohet se: *“4. Ankesa kundrejt heshtjes administrative mund të parashtrohet jo më herët se shtatë (7) ditë dhe jo më vonë se dy (2) muaj pas skadimit të afatit për njoftimin e aktit administrativ”*, si rrjedhojë, Kolegji i Këshillit, konstaton se meqenëse organi i punësimit ka heshtur ndaj kërkesës së ankueses, ankesa e ankueses e datës 27.11.2025 e parashtruar në Këshillin e Pavarur Mbikëqyrës për Shërbimin Civil të Kosovës është e pranueshme në kuptim të nenit 127 paragrafi 4 të Ligjit Nr. 05/L-031 për Procedurën e Përgjithshme Administrative.

Kolegji i Këshillit, duke u bazuar në kuadrin ligjor të cekur si më lartë, lidhur me obligimin e organit përkatës për të vendosur lidhur me kërkesën e palës, e obligon Njësia e Burimeve Njerëzore e Komunës së Prishtinës, që të nxjerr aktin administrativ në pajtim me legjislacionin në fuqi lidhur me shqyrtimin e kërkesës të parashtuara nga pala ankuese të përfshira në këtë vendim, në atë mënyrë që gjatë shqyrtimit të kërkesës të shqyrtohen të gjitha pretendimet e palës ankuese dhe të vendoset për të gjitha pretendimet në fjalë në kuptim të nenit 48 paragrafi 1 ndërlidhur me nenin 134 paragrafi 1 të Ligjit Nr. 05/L-031 për Procedurën e Përgjithshme Administrative.

Andaj, pas analizimit dhe vlerësimit të gjitha shkresave të lëndës si dhe duke u bazuar nenin 6 paragrafi 1, nën paragrafi 1.1 dhe nenin 18 paragrafi 1 nën paragrafi 1.2 dhe 1.4 të Ligjit Nr.06/L-048 për Këshillin e Pavarur Mbiqëqyrës për Shërbimin Civil të Kosovës i ndryshuar dhe plotësuar me Ligjin Nr.08/L-180, Kolegji vendosi si në dispozitiv të këtij Vendimi.

Këshillë juridike: Ky vendimi hyn në fuqi ditën e nënshkrimit nga Kryetarja e Kolegjit. Pala e pakënaqur e cila pretendon se vendimi i Këshillit nuk është i ligjshëm mund të iniciojë konflikt administrativ në Gjykatën Themelore në Prishtinë/Departamenti për Çështje Administrative, brenda afatit prej tridhjetë (30) ditësh nga dita në të cilën i është dorëzuar vendimi. Inicimi i konfliktit administrativ nuk e ndalon ekzekutimin e këtij vendimi.

KËSHILLI I PAVARUR MBIKËQYRËS PËR SHËRBIMIN CIVIL TË KOSOVËS LËNDA, A.nr.1953/2025

Rushit Kajtazi

Procesmbajtës

Eshref Shabani

Kryetar i Kolegjit

Vendimi i dorëzohet:

- Përfaqësueses së autorizuar të ankueses avokates Myrvete Hashani-Jashari;
- Komunës së Prishtinës (Kryetarit të Komunës dhe Udhëheqësit të Burimeve Njerëzore), si dhe
- Arkivit të KPMSHCK-së.